



La grupp da Castrisch vegn segonda en la categoria 300 m tar ils giuvenils: Thomas Camenisch, Remo Capeder, Gian Wetten e David Solèr (da san.).



Ils meglers giuvenils da noss chantun sin la distanza da 300 m. Laurin Caprez, Mauro Ardüser e Sarina Cajochen (da san.).

FOTOS G. N. STGIER

Victoria sursilvana traidubla

Tusaun: Di chantunal dals tiradurs giuvenils

DA GION NUTEGN STGIER / ANR

■ **L'elita grischuna dals tiradurs giuvenils è stada da la partida tar l'occurrenza a Tusaun per eruir ils campions chantunals en diversas categorias. Success han cunzunt er gi ils tiradurs giuvenils da la Surselva. En l'occurrenza singula tar ils giuvenils sin la distanza da 300 m èn be Sursilvans sin il podest.** Quest onn ha il di chantunal dals tiradurs giuvenils gi lieu pli baud che usità. Quel è vegnì integrà en la Festa chantunala da tir che ha lieu actualmain en il Grischun central. Da la partida a l'occurrenza èn stads ils 130 meglers tiradurs giuvenils che sajettan sin la distanza da 300 m ed 80 giuvenils che tiran cun l'arma da sport e cun la pistola. Per las mattas ed ils mats da diesch fin 20 onns è quel di chantunal in dals puncts culminants da la stagjun. Ils resultats ex-

cellents da la garda giuvna da tir conferman che en ils districts da tir vegn fatg buna lavur per la promoziun dals tiradurs giuvenils. Ina giada dapli è er sa mussà ch'ils matscheurs giuvenils da las regiuns rumantschas tutgan en il Grischun tar ils meglers. Er tar l'occurrenza a Tusaun han ils tiradurs giuvenils da l'intschess rumantsch ina giada dapli declassà la concorrenza sin la distanza da 300 meters. In fatg positiv è dentant er che adina dapli giuvenils ed en spezial blers Sursilvans e Sursilvanas tiran adina dapli cun l'arma da caliber pitschen. En quella chaussa presta cunzunt *Hubert Tomaschett* lavur da vaglia.

Dominanza sursilvana

La concorrenza principala è il tir singul nua ch'ils giuvenils sajettan diesch culp sin la schiba da 10. Gist en quella categoria è sa mussà ch'ils tiradurs giuvenils

da Sumvitg, Castrisch e Sedrun profitechan bler da lur manaders e cunzunt er dals tiradurs da quellas unius ch'èn adina davant en las rangaziuns da tir en noss chantun. Gudagnà la concorrenza singula tar ils giuvenils ha *Luca Cajochen* da la Societad da tir Vial Sumvitg e quai cun 96 puncts da 100 puncts pussaivels. Il tiradur da 17 onns ha cun quel resultat fatg dus puncts dapli che *Remo Capeder*, Castrisch, ch'è vegnì segund e *Manuel Giger*, Sedrun-Tujetsch, che ha er fatg 94 puncts ed è rangà sin il terz post. Mantgantà il podest cun avair in pli schlet culp bass ha *David Solèr*, Castrisch. El ha er fatg 94 puncts e quai è in bun resultat. Er tar ils giuvenils è in tiradur sursilvan, pli bain ditg ina tiradura, stada sin il podest. Quai è *Sarina Cajochen* da l'Uniu da tir Vial Sumvitg. Ella ha sajettà 92 puncts e vegnida terza. Gudagnà la categoria singula dals

giuvenils ha *Mauro Ardüser*, Tumeigl. El ha er fatg 92 puncts e stà sisum il podest be cun avair in meglie culp bass che *Laurin Caprez*, Sent, che ha sajettà il medem resultat.

Castrisch e Müstair

Ina part dal di dals tiradurs giuvenils tutga a la concorrenza da gruppas. Quai è ina concorrenza che procura adina per gronda tensiun. Danovamain èsi vegnì tar in cumbat Partenz-Surselva. Gudagnà han a la fin ils trais tiradurs e la tiradur da la grupp da Schuders e quai cun in resultat da 719 puncts. Ils quatter giuvenils da Castrisch han fatg 708 puncts e mantgantà cler da gudagnar l'occurrenza sco avant in onn. Da lez temp aveva la grupp da Castrisch schizunt fatg 723 puncts. Il terz post ha cuntanschi la grupp Chalavaina da la Val Müstair. Ils Jauers han a la fin fatg

705 puncts e damai set puncts dapli che la grupp da Sent.

Victoria per la grupp Surselva

La concorrenza da gruppas tar ils giuvenils ha danovamain gudagnà la grupp da Tumeigl. Als trais giuvenils èsi reussi da far 535 puncts e damai gist 16 puncts dapli che ses trais concurrents da Schiers. Il terz post han lura cuntanschi cun 507 puncts ils trais giuvenils da Sent, *Curdin Andry*, *Laurin Caprez* e *Fabian Raisun*. L'eldorado dals tiradurs che sajettan cun l'arma da caliber pitschen èn Trun e Tavau e quai èn er las duas unius che han lura dominà la concorrenza dumengia passada. Tar las gruppas en la cetagoria dals juniors han a la fin be trais puncts decidi en favur da la grupp da Trun. *Elena Tomaschett*, *Andri Tomaschett* e *Robin Studer* han sajettà 853 puncts e lur concurrents da Tavau 85 puncts, respectivamain 828 puncts.



Han gudagnà tar ils giuvenils la concorrenza da grupp: Manuel Schmid, Mauro Ardüser e Miguel Sgier (da san.).



Success per ils mats e la matta da Trun tar il cumbat da gruppas 50 m caliber pitschen: Rubin Studer, Andri Tomaschett ed Elena Tomaschett (da san.).



Qua ils matscheurs dal Patrenz che gudognan la concorrenza da gruppas.



Qua èn ils giuvenils da la Surselva che vegnan en paucs onns a dominar la concorrenza cun las armas da sport.